

彌勒菩薩所問本願經

竺法護譯



南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

彌勒菩薩所問本願經

聞如是：一時，佛遊於披祇國妙華山中恐懼樹間鹿所聚處。

與大比丘眾俱比丘五百人，一切賢聖，神通已達，悉尊比丘。其名曰：賢者了本際、賢者馬師、賢者愨波、賢者大稱、賢者賢善、賢者離垢、賢者具足、賢者牛齒、賢者鹿吉祥、賢者優為迦葉、賢者那翼迦葉、賢者迦翼迦葉、賢者大迦葉、賢者所說、賢者所著、賢者面王、賢者難提、賢者和難、賢者羅云、

賢者阿難，如是之輩五百比丘。

復有菩薩，如彌勒等五百人。其名曰：增意菩薩、堅意菩薩、辯積菩薩、光世音菩薩、大勢至菩薩、瑛吉祥菩薩、軟吉祥菩薩、神通華菩薩、空無菩薩、喜信淨菩薩、根土菩薩、稱土菩薩、柔軟音響菩薩、淨土菩薩、山積菩薩、具足菩薩、根吉祥菩薩，如是等菩薩五百人。

爾時，彌勒菩薩從座起，整衣服，長跪叉手，白佛言：願欲有所問，唯天中天聽者，乃敢問。

佛告彌勒菩薩：我當聽所問，便問在所欲，如來當隨其所欲，而發遣之，令心歡喜。

於是，彌勒菩薩，得聽所問，踊躍歡喜，白世尊言：菩薩有幾法行，皆棄諸

惡道，不隨惡知識中？

佛告彌勒菩薩：善哉！善哉！彌勒！菩薩多所哀念，多所安隱，愍傷諸天及人，乃發意問如來如此之義。諦聽！常思念之！

彌勒即言：唯然，世尊！受教而聽。

佛言：彌勒！菩薩有一法行，棄諸惡道，不隨惡知識中。

何謂為一？謂：寂靜平等道意。是為一法。

佛語彌勒菩薩：復有二法行，棄諸惡道，不隨惡知識中。

何等為二？①住於定無所起；②方便別諸所見。是為二法。

佛語彌勒：菩薩復有三法行，棄諸惡道，不隨惡知識中。

何等為三？①得大哀法；②於空無所習；③所知無所念。是為三法。

佛語彌勒：菩薩復有四法行，棄諸惡道，不隨惡知識中。

何等為四？①立於誠；②於一切法，無所疑；③樂處閑居；④等觀。是為四法。

佛語彌勒：菩薩復有五法行，棄諸惡道，不隨惡知識中。

何等為五？①常立德義；②不求他人長短；③自省身行；④常樂於法；⑤不自念身，常救他人。是為五法。

佛語彌勒：菩薩復有六法行，棄諸惡道，不隨惡知識中。

何等為六？①不慳貪；②除弊惡之心；③無愚癡；④無粗言；⑤其意如虛空；⑥以空為舍。是為六法。

佛語彌勒：菩薩復有七法行，棄諸惡道，不隨惡知識中。

何等為七？①有善權之意；②能分別於諸法寶；③常精進；④常當歡悅；⑤得於信忍；⑥善解定意；⑦總智慧明。是為七法。

佛語彌勒：菩薩復有八法行，棄諸惡道，不隨惡知識中。

何等為八？得①直見；②直念；③直語；④直治；⑤直業；⑥直方便；⑦直意；⑧直定。是為八法。

佛語彌勒：菩薩復有九法行，棄諸惡道，不隨惡知識中。

何等為九？①菩薩以脫於欲，遠離諸惡不善之法，無有想念，以得寂定歡喜，行第一一心；②已除想念，內意為寂，其心為一，無想無行便得定意，心為歡悅，行第二一心；③離歡喜觀，常為寂定，身得安隱如諸聖賢，所說所觀，心意無起，行第三一心；④苦樂已斷，歡悅憂感，皆悉為止所觀，無苦無

樂，其意清淨，得第四一心；⑤過於色想；⑥無復說想；⑦不復念種種想，悉入無央數虛空慧；⑧皆過無央數虛空慧，入無量諸識識知之行；⑨皆過諸識知之慧，無復有無之想，皆過諸無識之慧，便入有想無想之行，不見想得寂定三昧。是為九法。

佛語彌勒：菩薩復有十法行，棄諸惡道，不隨惡知識中。

何等為十？①得金剛三昧；②所住處，有所進益三昧；③得善權教授三昧；④得有念無念，御度三昧；⑤得普遍世間三昧；⑥得於苦樂平等三昧；⑦得寶月三昧；⑧得月明三昧；⑨得照明三昧；⑩得二寂三昧，於一切諸法具足。

彌勒！是為菩薩十法行，棄諸惡道，不隨惡知識中。

於是，彌勒菩薩以偈讚佛言：

世尊本布施	妻子及飲食	頭目無所惜	佛德度無極
護禁無所犯	如鷦愛其毛	奉戒無與等	功德度無極
已現於忍力	悉等諸苦樂	忍辱為大勢	佛德度無極
已了精進力	無上德對害	精進為大至	佛勤度無極
已斷一切惡	導師樂一心	大慧寂為力	佛淨度無極
清淨慧自在	自然無所起	智慧常第一	佛明度無極
慧降魔官屬	樹下得大智	上義離諸穢	佛力降伏魔
世尊轉法輪	大身師子吼	恐伏諸外道	佛慧度彼德
色妙無與等	戒德及智慧	精進度諸岸	佛道過眾德
難譬不可喻	無上大智慧	常講諸法寶	光明導御眾

爾時，賢者阿難白佛言：未曾有，世尊！是彌勒菩薩，所願具足，說法無缺減，講法字句平等，所說法句，無所縛著，講經竟無亂。

佛言：如是。如是，阿難！如其所云。彌勒菩薩辯才具足，所說經法，無所缺減。

佛言：阿難！彌勒菩薩，不獨以偈讚我。乃往過世十無央數劫。爾時，有佛號炎光具嚮作王，如來。無所著。等正覺。今現在成慧行。安定。世間父。無上士。導御法。天上天下尊。佛天中天。

爾時，有梵志長者子，名曰賢行，從園觀出，遙見如來經行，身色光明無央數變。見已心念：「甚善！未曾有也！如來之身不可思議，巍巍如是，光色妙好，威神照曜，吉祥之德以為莊飾。願令我後當來之世，得身具足如是光色威

神照曜，吉祥之德而自莊飾。」

作是願已，便身伏地，心念言：「審我當來之世得法身，若如來，無所著，等正覺者，如來當過我身上。」

於時，世尊炎光具嚮作王如來，知賢行長者子梵志心之所念，便過其身上。適越其上已，便得不起法忍。於是，佛還顧告侍者言：「我所以過長者子梵志賢行身上，即時令得不起法忍，眼能洞視，耳能徹聽，知他人心中所念，自知所從來生，身能飛行，神通具足。」

佛適過梵志賢行身上，便達眾智，五通具足，無所亡失。

即以偈讚佛言：

往來世到十方 人中尊無與等 唯志道過諸行 願稽首覺導師

以過諸世間明 及摩尼火炎光 佛光明為最上 願稽首覺導師
如師子一鳴吼 諸小獸無不伏 佛講法亦如是 悉降伏諸異道
眉間相清且徹 威無量如積雪 其光明照三界 佛在世無與等
聖足下生相輪 其輪妙有千輻 此土地及山陵 不能動無上尊

是時，佛告賢者阿難：欲知爾時長者子梵志賢行者，今彌勒菩薩是。

賢者阿難即白佛言：彌勒菩薩得不起忍，久遠乃爾，何以不速逮無上正真道最正覺耶？

佛語阿難：菩薩以四事不取正覺。何等為四？①淨國土；②護國土；③淨一切；④護一切。是為四事。彌勒菩薩求佛時，以是四事故不取佛。

佛言：阿難！我本求佛時，亦欲淨國土，亦欲淨一切，亦欲護國土，亦欲護

一切。彌勒發意，先我之前四十二劫，我於其後乃發道意。於此賢劫，以大精進，超越九劫得無上正真之道成最正覺。

佛告賢者阿難：我以十事，致最正覺。何等為十？①所有，無所愛惜；②妻婦；③兒子；④頭目；⑤手足；⑥國土；⑦珍寶財物；⑧髓腦；⑨血肉；⑩不惜身命。阿難！我以此十事疾得佛道。

佛語阿難：復有十事，疾得佛道。何等為十？①以法，立於誠德；②常行忍辱；③常行精進；④常一其心；⑤常行智慧度於無極；⑥不捨一切；⑦已得忍心，等於一切；⑧不習空；⑨得空法忍；⑩得無想之法。阿難！我以此十事，自致得佛道。

佛語賢者阿難：我本求佛道時，勤苦無數，乃得無上正真之道，其事非一。

佛言：阿難！乃過世時，有王太子號曰一切現義，端正姝好。從園觀而出，道見一人得疾困篤。見已，有哀傷之心，問於病人：「以何等藥得療即痊？」病人答曰：「唯王身血得療我病」。爾時，太子即以利刀刺身出血以與病者，至心施與，意無悔恨。

佛語阿難：爾時現義太子，即我身是。

阿難！四大海水尚可升量，我身血施，不可稱限。所以爾者，求正覺故。

佛語賢者阿難：乃往過世，有王太子，號曰蓮花王，端正姝好，威神巍巍。從園觀出遊，道見一人身體病癩。見已，即有哀念心，問於病人：「以何等藥療於汝病？」病者答曰：「得王身髓以塗我體，其病乃愈。」是時，太子即破身骨，以得其髓持與病者，歡喜惠施，心無悔恨。爾時太子，即我身是。

佛語阿難：四大海水，尚可升量。身髓布施，不可稱計。

佛語賢者阿難：乃往去世有王號曰月明，端正姝好，威神巍巍。從宮而出，道見盲者貧窮飢餓。隨道乞丐往趣王所，而白王言：「王獨尊貴，安隱快樂。我獨貧窮，加復眼盲。」爾時，月明王見此盲人，哀之淚出，謂於盲者：「有何等藥得愈卿病？」盲者答曰：「唯得王眼能愈我病，眼乃得視。」爾時，王月明白取兩眼施與盲者，其心靜然，無一悔意。月明王者，即我身是。

佛言：須彌山，尚可稱知斤兩。我眼布施，不可稱計。

佛語賢者阿難：彌勒菩薩本求道時，不持耳、鼻、頭、目、手、足、身命、珍寶、城邑、妻子，及以國土布施與人，以成佛道，但以善權方便安樂之行，得致無上正真之道。

阿難白佛：彌勒菩薩，以何善權得致佛道？

佛言阿難：彌勒菩薩，晝夜各三，正衣束體，叉手下膝著地，向於十方，說此偈言：

我悔一切過 勸助眾道德 歸命禮諸佛 令得無上慧

佛語賢者阿難：彌勒菩薩，以是善權，得無上正真之道最正覺。

阿難！彌勒菩薩求道本願：「使其作佛時，令我國中人民，無有諸垢瑕穢，於婬怒癡不大，慇懃奉行十善，我爾乃取無上正覺。」

佛語阿難：後當來世人民，無有垢穢，奉行十善，於婬怒癡不以經心。正於爾時，彌勒當得無上正真之道成最正覺。所以者何？彌勒菩薩本願所致。

佛語賢者阿難：我本求菩薩道時，欲護一切悉令得淨，處於五濁婬怒癡中，

樂在生死。所以者何？是諸人民多為非法，以非為是，奉行邪道，轉相賊害，不孝父母，心常念惡，惡意向兄弟妻息眷屬及他人，輕易師和上，常犯男子垢濁，轉相食啖，願處是時世，於中為佛。若郡國丘聚縣邑，但說眾惡轉相賊害，瓦石相擊杖相撻撥，便共聚會轉相罵詈，白還其舍，設置飯食。以毒著中欲害他人，起想垢濁，轉起誹謗，伏匿過惡，還相發露，無復善意。

佛言阿難：我以大哀普念一切，為此輩人講說經法。

賢者阿難聞佛說此，即白佛言：未曾有！是天中天。如來。等正覺，能至勤苦普弘大意，調御弊惡令得成就，為除重擔具足法寶，為此輩人說其經法。

佛言：如是。阿難！如汝所言，佛能忍此。爾乃應。如來。等正覺，教化剛強，為除眾冥。用佛法德具足之故，乃為此人說其經法。

阿難白佛言：我聞如來堅重精進等心如是，衣毛為豎。此經名為何等？云何奉行？

佛言阿難：此經名為《本願》，當持。《慈氏本行彌勒所問》，當善持之。

佛說經已。

彌勒菩薩、賢者阿難、賢者大迦葉諸大弟子，及眾菩薩，一切會者，諸天、龍神、乾沓怛、世間人，聞經歡喜，前為佛作禮。

彌勒菩薩所問本願經

無上妙法喜見聞 彌勒本願所問行 調御弊惡除重擔 棄諸垢穢得安隱

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>